

April
2017



KRISTIAN THALAI

thlen
chin
atanga
HMASAWN

Vol. VIII No. 2

Kristian Thalai Pawl Chanchinbu thla tin chhuak



Dawrpui Bial Diamond Jubilee



Chhiahtlang Hmar Veng Branch Golden Jubilee



Khawkawn Branch Diamond Jubilee



Nisapui Bial Conference



Armed Veng Branch workcamp @ Gharmurra

Kristian Ṭhalai Pawl chanchinbu thla tin chhuak

1970-a chhuah ṭan ■ Kum 47-naa vawi 4-na ■ Chhuah tawh zat : 461

Editor :

Lalchhuanliana

Joint Editors :

Lalhnehzova

Lalfamkimi

Lalmuanawma

Dr. David C. Vanlalfakawma

Manager:

Lalmuanpuia

A lak man :

Kum khatah - Rs. 80.00

Copy khat - Rs. 7.00

*Thu chhuah tūr nei chuan Editor,
Kristian Ṭhalai, Synod Office-ah thawn
tūr a ni a; a la duh chuan KṬP Office-ah a
man pèk lâwk a ngai.*

Office Phone : 9436142398**E-Mail :**kristianthalai1970@gmail.comcentralktp@gmail.com**KRISTIAN ṬHALAI PAWL****Thupui**

Rawngbawl tūra chhandam

Thupui inngahna

Ephesi 2:10. Thil ṭha ti atán
Krista Isuaah chuan siama awmin,
ama kutchhuak kan ni si a, chu thil
ṭha tih chu kan awmna tūrin
Pathianin a buatsaih lâwk a ni.

Thiltumte

1. Isua Krista rinna leh amah anna
kawnga ṭhalaite hruai.
2. Kohhran kutke ni tura ṭhalaite
buatsaih.
3. Kohhran hnathawh tihpuitlin.
4. Krista Chanchin Ṭha puan
darh.

A CHHUNGA THU AWM

1. Editorial	2
2. Kraws lo chu	3
3. Hun vawn dik	6
4. Krista mo	8
5. Ṭhalaite – kohhran tan	12
6. Rawngbawl tura chhandam	15
7. Work Camp report : <i>Gharmurra</i>	19
8. Hriselna : <i>Meizialah hian eng nge awm?</i>	22
9. Rimawi : <i>Zaipawl rawngbawlna ngaihhlut</i>	25
10. Kantu – Lawngṭlai Bazar Branch	30
11. Keimahni	31



“Sial rângin sial râng a hring, sakâwlin sakâwl a hring,” an lo tih angin – rorelna hmanga inkaihruai ðhin kohhran hnuaiia ðhalaite pawh kan theih tawk leh kan phak ang tawkin rorelna hmangin kan inkaihruai ve zel a, inkhawmpui rorel leh committee thu lovin kan kohhran hi a kal mai ngai lo va, hei hi kan himna leh inpumkhatna ðha min

siamsaktu pawh a ni.

General Conference kan neih loh kuma Rorel Inkhawm kan neih ðhin pawh a wawi 7-na chu Pathian hruaina changin tluang takin kan lo zo ta a, Pathian hnenah lawm thu i sawi ang u. A thlengtu Bawngkawn Kohhran hruaitute, KÏP lam leh kohhran mipuite inpekna thuk tak te avangin kawng engkimah a hlawhtling a ni. Rorel palaite inpekna te, chanvo leh mawhphurhna changtute leh chhintu zawng zawngte avanga he Rorel Inkhawm hi hlawhtling a ni tih erawh hai rual a lo.

General Conference leh Rorel Inkhawm kan lo neih tawhte kaltlangin KÏP-ten kan phak tawk leh kan hma zawna tih tur awm angte hmangin rawngbawl hna kan lo thawk tawh ðhin a, hei hian kan ram ðhalaiteah inlungrualna leh thawh hona ðha tak a lo thlen tawh a, Pathian hnathawh lo thleng fo tawhin, chung hmalakna chuan rah duhawm tak tak pawh a lo chhuah tawh ðhin a ni.

Ro kan rel ðhin hi rawngbawl na kawnga hma kan sawn theih nan te, ðanpui ngai ðanpuina tur te, inpumkhatna thuk zawk kan neih theih nan te, hnungtawhlthen hawi kir lehna remchang an hmuh theih nan te, kan thlarau nun tihchak nan te hman a lo ni tawh ðhin ang khan, kumina Rorel Inkhawm kaltlanga hmachhawp tam tak tihlawhtling thei tur hian member tinin mawhphurhna thuk tak kan nei ðheuh a ni tih erawh kan hriat thar a ðul hle.

Chutih laiin thil ðha zawng zawng erawh kan tihlawhtling thei lo a ni tih chu phat rual a ni lo va, rawtna zawng zawng tihlawhtlin vek remchang lo pawh a awm a, kan theihnain tlin chin a neih miao avangin kan phak tawkah erawh kan lungawi a ðul ðhin si. Rorelna ngaihtuah tur bial aþanga lut ðhin hi thil ðha duh vang leh hma lam pan duhna rilru a ni vek tih erawh a lang Chiang hle a, ram puma hmalakna tur leh kan mamawh ngaihtuah chhuak zel turin Bial leh Branch-ten ngaihtuahna i seng zel ang u.

A tawp berah chuan, rorelna fel hi a pawimawh rualin, rel angin hma kan la em, tih hi a tehna tur a ni. Rorel ang taka hlen chhuah hi member tin chanvo a ni a, ka tih loh chuan tun nge ti ang tih rilru pu chungin, kumin chhunga Rorel Inkhawm hmanga rawngbawl hna kan thawh tur hi, mihring tih theih piah lama thiltihtheihna neitu Lalpa en chungin ðahnemngai takin i thawk ðheuh ang u.



KRAWS LO CHU

– Rev. James Lalremmawia
Ṭawipui North II

"Kei erawh chuan kan Lalpa Isua Krista kraws lo chu ka chhuan loh turzia mai chu, chumi zarah chuan khen behin a awm ta, kei pawh khawvel tan khen behin ka awm a ni." (Galatia 6:14)



ouis Albert Banks-a lehkhabu "Great Themes of the Bible"-ah khan thuhritlu ropui tak D.L. Moody-a'n tân in a tlawh thu a ziaak a. Chu tân ina tâng mekte hnena Pathian thu a sawi zawh chuan a mal mala kawmin, eng vanga tang nge an nih a zawt hlawm a. A chhanna hmuh chu a inang tlang hle - "Ka tihsual ni miah lovah min puh", "Roreltuin dik lo takin ka chungthu a rel", "Dâwtin min hêk", "He laia awm tur hi ka ni lo," tih leh mahni inthiamna thu hlir a ni hlawm. A tawp berah erawh chuan hmai hupa lo ṭap hawm hawm a va hmu a, a chhan a va zawh chuan, "Ka sual a nasa em a, ka phur zo ngang lo a ni," tiin a lo chhang thung a.

Mi dawihzep ber berte tihuaisentu, mi sehhe ber berte vel ṭap lawi thei si chu kraws hi a ni. Chu krawsah chuan damlo tan damna a awm a, phurrit phur tan chawlhna, lungngai tan hlimna, vanduai bik nia inhriate tan thilpek ropui dawn tur a awm bawk. Hring nun zawhna ril tam tak hrilhfiahna chu he krawsah hian a awm. Mahse, chu kraws malsawmna dawng tur chuan thil dang zawng aia duh a ngai thung si.

Kum zabi pakhatna khawvela Kristian hmasate dinhmun kha a khirh hle. AD 60 hma lamah kha chuan Kristian sakhua pawh a zalen rih viau va, Rom sawrkar mitah Juda sakhaw peng pakhat ang chauhva ngaih a la ni. Juda sakhua lah chu sawrkar hriatpui thlap (religio licita) a ni bawk si. Mahse, hun kal zelah a danglamna a chiang

tual tuala, Rom sawrkar mitah a hnawk ÷an ta.

Rom ram zau tak mai, hnam hrang hrang leh ÷awng dang dang hmangte tuallenna chu suih khawmtu hmanrua a ngai a, an hmanraw chhawp chhuahtak sakhua tluka phuar khawmtu ÷ha a awm thei lo hial awm e. Rom khua leh tui, a ram awp chhunga awmte tan kum tin Kaisara hnena rintui hala, "Kaisara chu lal a ni," tih puan chhuah chu tihmakmawh a lo ni ta. Chutiang ti thei lo chu sakhua kawnga rinawm lo mai ni lovin Rom ram muanna (pax romana) tiralkheltu tur an nih avangin phatsantuah ngaih an ni a, na lua awm lova an chung hremna lek theih a ni.

Rom sawrkar hi sakhua kawngah a inhawng zau lo a ni lo va, mi mal leh hnam tinten an duh sakhua vawn a la phalsak tho rualin Rom ram pum khai khawmna sakhua, Kaisara biak chu tihmakmawh a ni tel ta tlat. Isua chauh lo chu Lala pawm thei lo Kristiante dinhmun a chep ta takzet. Chu mai a la

ni lo, Messia nghakhlel bertu ni lawi si Juda-te mitah Kristiante kha an hnawk em em bawk a, pawl chhuak naran mai an ni lo, a ni telin an pung zel lehngal. Juda Kristian ÷henkhat, duh fir pawl an la awm lehzel a, Kristian ni tawh mah se serh tan leh Juda-te serh leh sang a bi kima zawm an la phut cheu. Khawngaihna kha a petu pek chhuah maia duhtawk lova, a dawngtuin khawngaihna phu khawpa dan hmanga tlin ngei sawi mawi pawl leh zirtirna dang dang phurpui leh sawi mawi pawl an phu nuaih nuaih bawk.

Chung zawng zawnga Paula chhanna chu kraws a ni. Chu krawsah chuan Pathian hmel a lang Chiang a, a nihphung pawh mihringte hriat thiam phak tura puan chhuahin a awm ta. Pathian thianghlim leh ÷ihbaiawm, mihring tana tlangnel taka pawh mai theih loh nia an hriat ÷hin chuan hmangaihna hmel thar tar langin, Krista avangin krawsah a fiah ta kelh mai. Kraws thiltihtheihna a lang ÷an

ta nghal a, thinlung sak sipai za hotu pawhin Pathian fa a nihna a thup zo ta lo.

Nimahsela, chu kraws chu thlen zawh a harsa hle mai si. Ṭawngkam thiam ngaisang, dang nal, 'Tûr pawh a funna a mawi phawt chuan' tih ang maia, an thil sawiin eng thu nge a ken tih aia a sawina ṭawngkam leh sawi dan dah sang zawk, finna thlahlela buai reng mai Greek-ho tan kraws thuchah hi a fiah mawh khawp ang. Juda-ho tan hlei hlei a chiang har ngawt ang le. Pi leh pute aṭanga zirtirna inhlan chhawn kawnga fîr zet, 'Thinga khai kan apiang chu Pathian anchhe dawng' tih lo vawng tlut mai tan kraws thlangtu Isua chu an nghah Messia nia ngaih a har hle ta ve ang.

Tunlai khawvel, hriatna nasa taka a pun mekna, a dik ber tehfung awm mang tawh lo, thu dik chu a tehtu azira a danglam mai mai tawhna hunah hian kraws thlen a harsa zual mang e. Eng vangin nge kraws thlen chu a harsat em em mai le?

A chhan ni theia lang ṭhenkhat

Kraws pante chu thiam loh chang an ni – thiam thu sawi tur hi kan la ngah em a, kraws kan thleng zo lo leh ṭhin.

Kraws pante chu an kir tawh lo – Kirna remchang kan dap mai pawh ni lovin, kir leh thuta mamawh tur kan inchhawp ru lawk chawk mai.

Kraws chu thihna a ni – nung tura thih hmasak a ngai tih hi pawm thiam a la har em a, mahni thihna tur tih chiang sa kawngṭum zawh hi a har kan la ti tlang em bawka ni.

Kan Lalpa tuarna kraws putpuia, thlan sa phat phata kraws kawng kan zawha, a tawp kan thlen loh chuan a thawhlelna nun kan ṭawmpui thei si lo. Nunna thar, duhawm zawk nei tura kan chhuanlamte kan dah ṭhat hunah leh thih ngam lu pua kraws kawng kan zawh hunah Good Friday leh Easter Sunday hian kan nunah a awmze dik tak a la pho chhuak ngei ang.

.....

HUN VAWK DIK

– *Tv. Ramnghinglova*
Phuldungsei Branch

Ran thupui hun vawn dikin a tum ber chu tih tur tihlawhtlin hrim hrim lam ni lovin, a hunbi taka tih tur tih hi a ni a, thil tih kawng engkima tlai lo tura thalaite buatsaih hi a tum ber chu a ni.

Mihringte nunphung leh khawsakna thil pawimawh tak pakhat chu hun vawn dik hi a ni. Ram changkang apiangah hun vawn dik an ngai pawimawh thinn a, hun hlutzia an hre Chiang thinn. Changkanna leh hmasawanna rahbi pawimawh tak pakhat a ni a. Ruahmanna felfai tak pawh awm mah se, a hun taka ruahmannate tih-hlawhtlin a nih loh chuan a hlut tur angin a hlut loh phah thei a, a hlawhchham phah der thei baw a ni. Pawl, chhungkua leh mi mal that lohna lanna pakhat chu hun vawn dikah hian a ni.

Mihring piang tawh phawt chuan hun kan nei a, kan hun neihte tha taka hmang turin hnathawh tur kan insiam thinn a,

chu kan hnathawh tur chu eng hna pawh ni sela a hun tak atan emaw tih a nih chuan a hlawhtling mai thinn a ni. Hun hlutzia hre Chiangtu chuan hun a vawng dik lo ngam lo va, “Hun leh tuilianin tu mah a nghak lo,” tih a hriat tlat avangin tlai pawizia a hre thinn. Mi tinin ni khata kan hun neih a inchen vek a. Mi aia tlaite hian hun an nei tlem bik a ni lo va, chutiang bawkin mi aia hma thinte hian hun an ngah bik a ni chuang lo. A awmziaah chuan – hun neih dan lam ni lovin hun hman dan a inang lo zawk mai a ni. Kan hun hman dan azirin kawng engkimah kan tlain kan hma thinn.

Hun vawn dik hi khawi hmunah pawh a pawimawh em em a. A bikin thalaite rawng-bawl na hmun pawimawh tak mai Kristian Thalai Pawl (KTP) huang chhung bik luhchilh han tum ila. KTP hi kohhran kutke pawimawh tak mai a ni a, chu vang chuan inrelbawl na pawh fel/mumal taka kalpui thinn a ni. Member tinten rualkhai taka ke kan pen theih nan leh a huhova kan chet theihna turin rawng-bawl na peng hrang hrangah hunbi te ruat thinn a ni a. e.g. inkhawm, fellowship, hnatlan,

committee, hla zir hun te, etc. Heng hunbi fel taka ruatte vawn dik hi kan chanvo, kan hlen ngei tur a ni. Ṭan huna thlena, ṭan chat thei tura miten hun kan vawn dik theuh a pawimawh hle a ni. Hun kan vawn dik dan aṭangin miten eng ang mi nge kan nih an hmu thei a ni.

Tlai fo chin hi puitlin lohna zia a ni a, ringtu tan thil mawi lo tak pakhat a ni. Hun kan vawn dik loh avang hian harsatna tam tak a thleng thei a, a hun taka ṭan a nih lohva kan tlai hian hun kan paih a, ban hun awm takah emaw, zawh hun awm takah emaw pawh kan la thawh reng phah thei a ni. Hun tam leh thawl nei thei reng si kha tlai avangin hun chep kan insiam thei baw a, hmanhmawh tak leh phili deuhva kan chet a ngaih phah thei a ni. Thawh zawh theih mai tur kha kan tlai avangin kan thawh zawh loh phah thei a, hun danga tih leh a ngaih phah thei baw a ni. Thil ṭhenkhatah tlai avangin a thleng hmasate kan tihual thei a, hma taka thlen hian mi dangte phurna kan siam thei a ni.

Hun vawn dik hi mi puitling ze lanna pakhat a ni a. Tlai lo turin khawsak a rel fel thiam a, thiltih

kawng engkimah a hmasa nih a tum ṭhin a ni. Mi nghah ngaia awm te hi thil zahthlak a ni a, a nghaktu zawk nih tum ṭheuh tur a ni. Mi ṭhenkhat chu, “Tu mah an la awm lo vang, an la tlem awm em mai...” tih avang ten an kal hma duh lo ṭhin. Nghaktu zawk nih hreh, mi tam hun chauh nghak ṭhin chu ringtu puitling lo rilru pu a ni. Tin, inkhawmah ṭan hmaa zai rei peih loh vang te, lo ṭhut reng nin vang te pawhin kal tlai luih a awm thei baw a. Mahni tisa thil avanga kohhran thiltihnaa kan tlai emaw, hman loh emaw, inthlahdah vang emaw a nih chuan Pathian duh loh zawng a nih a rinawm. Mahni hnathawh dan thawh thiam a pawimawh a ni. Kan ngaih pawimawh danah hun vawn dik hi a inngat thuk hle baw a ni.

Tlai ngai lo Pathian zuitute hi kan tlai fo a nih chuan thil inhmeh lo tak a ni. Hun neitu leh siamtu Pathian chuan hun hlu tak a pe che a, chu i hun chu tu kutah mah a awm lo va, vawng dik turin i kutah a awm a ni. Hun hi lunghlu, rangkachak leh pawisa aiin a hlu zawk a ni. Hun vawn dik kawngah theih tawp i chhuah ang u.

.....

KRISTA MO

– Lalmangaihzele
Pehlawn

Ani ang pa zahawm leh mi fel, duh ni sela duhthusam nupui thlang thei khawpa mi awhawm khan nuthlawi nau pawm lai, a fa pawh tu fa ber nge ni ang tih khawpa a rem rem kawp hreh lo mi nupuia a han nei mauh mai chu thenawm khawvengte mak tih a hlawh a. Chu achhapah a chhungte chuan eng ang mi pawh ni se, a neituin a duh miao chuan tiin pawmpui han tum thin mah se, a la thaibawih em em zui mai bawk si a, an lai a na tlat thin.

A nupui lah chu enkawl-na tha leh zirtirna tha pawh dawng lova sei lian a nih avangin a pasal bula a awm chu a khawr hle mai a, a hmangaihna chhan let dan pawh a thiam lo. Tih tur leh tih loh tur pawh hre lovin, chu a chhungkaw tharah chuan engtianga nun tur nge tih leh engtianga awm tur nge tih pawh a hre thiam lo. Se

khual ang maiin a ti dui mai a, tih tur an sawite chu a thiam ang ang chuan a ti mai a; mahse, thil tihsual a hlauh luatah a thiltihte chu a khawrin thil dang an sawi chin ni lo pheih chu han tih ve pawh a ngam lo. A chang pheih chuan a nun dan thar chu a ning leh thut thin a, a thian hluite khawlaia thawveng tak maia an leng chhuak a hmuh te hian, an in chu chhuahsan leh daih mai te a chak rum rum thin. Eng emaw chang chuan a han kawm ve leh zeuh thin a; mahse, a thian hluite bulah pawh tun hma ang khan a hlim tak tak chuang lo. A chhan chu – a kawm leh a nih chuan a tawpna tur chu a hre chiang hle bawk si.

A nun dan hmasa zawk kha chu a awlsamin tu mitmei mah ven ngai lovin a awm thei a, a nulat lai pheih kha chuan helhkam tur leh han vei em em tur a nei lo bawk a, a duh dan dan khan a khawsa mai a, nuam pawh a ti viau thin. Mahse, fate a han nei a, harsatnate a han tawh takah chuan a nulat lai ang ngawta khawsak chu a theih tawh

hauh loh. A fa neih avang chuan harhfima thil ngaih-tuahna hun te a han neih theih tak hnuah pheichuan a hma lam hun chu thim hlein a hria a, a beidawng em em a. A harsatna tawh ațang chuan han tal chhuah mai ngaihna a hre bawk si lo, țanpuitu tur han pawh mai tur an awm a hre bawk si lo. A pasalin a nupui ni tura a sawm khan a awih lo em em a, rinhlelnain a khat a. A pasal hmela hmangaihna mit meng a hmuh te khan a lung a tichhia a, a phu lo lutuk kha hnar hial mai a duh a; mahse, pan tur dang a nei bawk si lo. Tihtakzeta a sawm avangin a nei ta a, an inneih tirh kha chuan a hlimna khan van a chen hial awm e.

A pasal chuan a nupui khawsak dan chu a duhthusam ni hauh lo mah se, dawhthei takin keh thei dawmin a dawm a. In chhung chet zawng zawng pawh khawiha, nupui leh pasal nih fawma hmeichhe pakhat vang maia an chhuan ve em em mai chutia a han awm mai chu a chhungte chuan an khawngaih a, țhen leh mai tura an

thlem loh leh thunun deuh turin an rawn chamchi a; mahse, ani chuan "a la hun lo" tiin a chhang mai țhin. Engtiang pawhin awm se a hmangaihna a reh dawn chuang lo tih a chiang em em a, han țhen ngawt dawn se pan tur dang a nei loh avangin a nun ngaiiah bak let lehna tur a nei lo. A dinhmun hmasaa awm leh tura a han suangtuah ringawt pawh hian a rilru a na tlat țhin. An innei hlim hlaut a ni a, a tlin lohna leh a tihsualte hrilha, thununna leh zilhauna nen khawng taka a enkawl nghal ngawt chuan nuam lo a tih phah ang a, a chhuah bosan mai ang tih a hlau a ni. Eng tikah emaw chuan a hmangaihna chu hre thiamin hrilh kher pawh ngai lovin a duh zawng anga awmin, lawm takin a thinlung zawng zawngin a hmangaihna chu a la chhang let ve ang tih a beisei tlat a ni.

Chutichuan, harsatna a tawh apiangin phunnawi lovin a tihsak zel a, thil țha nia a hriat chu a tihsak zel bawk a. A khawsak dan leh a awm dan ațanga teh chuan a pasal ațanga

hmangaihna a dawn chu phu lo a inti em em thin. Mahse, thawklekhata han insiam that nghal vek chu harsa a ti em em bawksi. Ni tin chuan a hriat loh karah hmasawna a nei ve hret hret zel a. A pasal hna atanga a lo haw changa inbualna tur a lo siamsak ringawt pawh hi amah tak chuan a pasal laka a hmangaihna dawn atanga chhut chuan eng thamah ngai lo mah se, a pasal chu a lawm thei em em mai a, thil ho te a tihsak pawha a lawmia a hmuh chuan amah pawh a hlim ve tan a, a aia tha zawk leh ropui zawk tih chakna a neih phah zel a. A pasal pawh chuan a hmangaihna chu a hre thiam tan ve tih hriain hmangaihna nen a nun dana tha lo lai awmte chu thuhnuairawlh takin a zilh pah reng bawka. A zawng zawng chuan tha vek rih lo mah se, a theihtawp a chhuah ve tih a hriat chuan a lawm em em thin. Tichuan, ni tinin hma-sawna thar nen an nung ta a ni.

He thawnthu ang chiah hian ka unau (Ka'n ti hlui teh ang), nang leh kei hi Krista mo kan ni a, a nupui chan khi kan chan a ni a, a pasal zawk hi

Lal Isua a ni. Tu mah tha sa leh fel saa piang kan awm lo va. Eden bawhchhiatna avanga soal saa piang chu Lal Isuan kraws lerah tuarin min rawn chhanchhuak a, piantharna kan chan chiah khan Krista mo kan lo ni ta a ni. KTP member-te hi mi chi hrang hrang kan ni a, thenkhat chu mo nihna rei tawh takte kan ni ang. Chutih lai chuan mo thar an awm ve reng bawka. Mo neitun min enkawl dan pawh a inang vek thei lo a ni tih kan hriat a tul. Tin, mawh-phurhnaah pawh hruaitute leh active member-te leh member tharte pawh a inang thei lo va. Tin, kan thahnemngaih chin leh thahnemngaihna kawng pawh a inang kher lo vang.

Tunlai khawvelah thalai tam takin kohhran leh KTP kan ngaih pawimawh tawk tawh loh lai leh, hmun thenkhatah member indaih lohna a nasat avangin hruaitu tan chuan a luhaithlak duh hle a, thahnemngaihna avangin han inphut san deuh chang pawh a awm thin. Amaherawhchu, kan beisei lo ang deuhva an awma,

inkhawm an tlem deuh emaw, hnatlang an tlem deuh emaw, hla zir tur an tlem deuh emaw chang hian anmahni han dema, sawisel mai an awl thin. Heng hunah tak hian mo neitu thiltih dan kha kan hriat a tul khawp mai. Kan insawisel a, kan indem vak vak hian hma kan sawn phah em tih te, thawh hona a that phah em tih te kan ngaihtuah a ngai a ni. Hengte hian kan phur a tirit a, rilru nawm loh phah nan kan hmang a nih chuan, kan phurrit te min chhawk peih rengtu Lal Isua kan nei tih hi hriat a tha khawp mai. Hnatlang kan tlem emaw, hla zir kan thahnem lo emaw a nih pawhin, Gideona'n Midianho a beih dawn khan Pathianin Israel-hote, "Keimahni kut ngeia inchhandam kan ni alawm," tia an uan khum a hlauh avanga mi zathum chauh a thlan chhuah te kha kan ngaihtuah thin ila. Kan duhtusama chak taka kan kal vut vut chuan kan theih tak em maw tiin kan chapo mai ang a, Pathianin ropuina a chang thei lo palh hlauh dah ang e.

Krista hian mi zawng zawng hi a mo ni turin min duh a, mi tin hi thlei bik nei lovin, angkhat vekin min hmangaih a. Chu chanchin tha chu khawvel mi zawng zawng hian hria se a duh a ni. Chumi palai hna thawk tur chuan keini hi mawhphurhna min pe a, chanchin tha hre lote hnena hrilh hi kan tih tur a ni. Kan velah buh seng tur tam tak a awm a, سوالين a bawm, kal ngaihna hre tawh lo leh, chhanchhuah ngai an nih pawh inhre lo mi tam tak an awm a. Eng ang mi pawh ni se, سوال لاکھ فاکھ تام تاک لو هرینگ تاه پاه نی سه, Lal Isua chuan hmangaih tawp lovin a hmangaih a ni tih hriain, kan hmelma, kan huat zawng pawh ni se, thahnem ngai takin Lal Isua lam an hawi theihna turin keini Kristian thalaite hian theih-tawp kan chhuah tur a ni. Movin a pasal hmangaihna a hriat chian hnua a nun a thlak ang khan, Lal Isua hmangaihna kan hriat chian poh leh سوالين کان اوم تھی هاه لو وانگ, سوال چو ا هوات زوانگ ا نی سی ا.

.....

ṬHALAITE KOHHRAN TAN (Ephesi 2:10)

– Upa Lalengmawia Ralte
Aizawl Kohhran

Kan thupui hi a pawimawh hle a, kan sawi kim sen dawn loh avangin ngaihtuah zui tura bul ṭan tharna atan hmang ila a ṭha awm e.

Kohhran hi eng nge ni?

Sawi vek a ṭul awm lo ve, a tlangpui chauh sawi ila – kohhran chu Pathianin khawvel atan a koh chhuah ringtute, thuneihna a pek, kutke atana a hman zui zel chu a ni. Krista taksa siam puitling tura peng zawng zawng infawk khawma, a thisena a lei a ni (Tirh. 20:28).

Kohhran hi Thlarau Thianghlina Pathian inlarna, Pentikos Ni aṭanga inṭan, chumi aṭanga thawhleha inkara Krista ringtu, Thlarau Baptisma changte inpawl khawmna a ni. Kohhran chu Krista nen a inzawm tlat a,

Krista chu kohhran inngahna lungphum a ni (Eph. 1:23; 1 Kor. 3:11).

Kohhran hi Pathian Thlarau Thianghlina chenna leh hna a thawhna a ni a, Pathian leh mahni ngei inngaih pawha tling lote fun khawmtu a ni.

Kristian Ṭhalai Pawl

Kristian Ṭhalai Pawl hi kohhranin a pawng din mai lo va, din chhan pawimawh tak tak a nei a ni. A thiltum pali bakah heng thil pahnihte hi hriat tel fo a pawimawh hle:

1. Mizo nun phung siam ṭha tura kohhran leh vantlang zinga rawngbawltu a ni.

2. Ṭhalaita tana kawng ṭha, inhmanna tur remchang, Pathian leh a kohhran tana mi ṭangkai nih theihna tur ruahmanpuitu a ni.

Ṭhalaita u...

— In pawimawhzia in hriat reng chuan ṭhalai rawngbawlnain hma a sawn ang a, a nung ang a, kohhran a lo chak ang.

— Kohhran chhunga awm, kohhran tichaktu ni tura din

in ni. Mahni ngaih dan leh ṭha tih zawng ringawta kal leh rawngbawlnaa chak tum chi a ni lo.

— Mawhphurhna leh chanvo thu-ah chhungkua leh laina, ṭhian ṭha induhsakna chi a ni lo. Lalpa zai ngaia kal hi a him ber.

— Krista chu kan soal zawng zawng laka min chhandamtu leh chatuan nunna min petu a ni tih hre chiang ula, he leia a phun kohhhran hi ngaina tlat rawh u. In tisial lo vang.

— Kohhhran neitu tak in ni tih inhre chiang lova, tel ve ang leka inngaihna in nei a nih chuan in rawngbawlnain awmzia a nei lo vang. In nihna hre chiang tura kohhhran in belh tam a pawimawh hle.

— Krista neitu dik takte chuan kohhhran invawna leh inrelbawlna hi hnawksak ti lovin, amah vawng himtu a ni tih a hre reng tur a ni.

— Fapa chuan a pa ro a khawm ṭhin angin, ṭhalaite hi kohhhran enkawltu in la ni dawn a, a chhiat a ṭhat pawh in kovah a innghat ang. Kohhhran inkhawm zahawmna te, mawi leh ṭha kan nih theih

nan ṭhalaite hi in pawimawh.

— Kohhhran chu neitu nei a nih avangin, a chhunga awm ṭhalaite hian kohhhran chu kan pawisain kan ngai pawimawh tur a ni.

— Ṭhalaiin a dinhmun leh nihna a hriat chian loh chuan kohhhran a sawisel a, kohhhran a dem ṭhin. Kohhhran dem leh sawisel ching mite hi mi rin tlak an ni duh lo hle. Lal Isua hre chianga, kohhhran dintu leh neitu a nih hretu chuan, kohhhran chu ringtute himna kulhpui, soal leh hmelma thiltihtheihna laka humhimtu a nih a hre reng ṭhin.

— Taksa peng tin nunna hi taksa pum pui aṭangin a lo awm a, a pengte aṭangin taksa a nung lo. Ṭhalaite pawh kan bulpui kohhhranah kan inngah deuh deuh a ṭul.

— Krista taksa siam puitlin nan kohhhrana ṭhalaite hi peng pawimawh tak pakhat in ni a, in nihna hre chiang lova kohhhran ep zawnga in awm chuan kohhhran hian a ṭhiat thei che u a ni.

— Pathian thu hi intihdik nan te, insiam ṭhat nan te, nun dik

inzirtir nan te hmang ula. Chutiang a nih phawt chuan kohhran tan hman tlak in ni ang.

— Hmeichiate hi mipate ropuina tura siam an nih angin, thalaite hi kohhran ropuina tura din in ni. Pathian hmangaihtu leh piangthar dik tak chuan kohhran a hmanngaih a, kohhran than len nan thahnem a ngai a, theihtawp a chhuah thin.

— Ringtu Pathian fa lo ni ta chuan engkim petu leh hmangaihtu duh zawng tih ve a lo chak a, chu rilru chuan thil tha a tihtir thin a ni.

— Lawm nachang hre lo mihring chu khawvel thilah pawh mi pangngai pha lo a ni thin a, Pathian atanga chhandamna dawngtuin a lawmna entir nan thil tha a lo tih chu a awm reng a, thil tha tihna hmun pawimawh tak pakhat chu kohhran a ni.

— Piangthar kan ni a, hruaitu pawh kan ni ang. Pathian buatsaih thil tha ti atana siam dinhmunah kan ding thei, thil

tha ti atana siam i nih i hmang tha em? Thenawm khawveng tan hnawksak leh tawngkam hman thuah te, bawlhhlawh paih danah te thil tha tia siam i nih angin i awm em?

— Thalai chu kohhran tana thawk a nih angin, a neitu Pathian rawngbawl a nih a inhre tur a ni.

— Kohhran inkhawmah thalaite in lan tam hian kohhran zia in tilang a, in tlem hian thalai zia in tar lang thin.

— Kohhran zaipawl tha leh nung hian kohhrana chen a tinuam a, kohhran ropuina pawh a ni.

— Kohhran hnathawh tihpuitlinna kawnga thalaite an lansarh hian kohhran nun a tichiang thin.

— Thalaite hian kohhran tana kan pawimawhna chhut in ngaihtuah thin ang u. Kan awmna tura khawvelin a chuktuah rem a ni lo va, Pathian ngeiin min buatsaih-sak a ni si a.

Rawngbawl tura chhandam (Ephesi 2:10)

— *Upa Zothanmaawia
Hualngohmun*

Hei hi Kristian Ṭhalai Pawl thupui a ni a, kawng hnihin a kalpui theih awm e. Ringtute chu rawngbâwl tûrin Lal Isuan min chhandam thu a ni a; ringtute chuan mi dang la ring ve lote chu Lal Isua rawngbâwl tûra chhandam an nih theih nan Chanchin Ṭha kan hrilh a ngai, tiin a kalpui theih baw.

KṬP-te chuan he thupui tihlawhtling tur hian thiltum pali kan nei a. Chung kan thiltumte chu –

1. Isua Krista rinna leh Amah anna kawnga ṭhalaite hruai.
2. Kohhran kutke ni tûra ṭhalaite buatsaih.
3. Kohhran hnathawh tih-putlin.
4. Krista Chanchin Ṭha puan darh.

Hetiang hian i han sawi zau deuh teh ang:

1. **Isua Krista rinna leh Amah anna kawnga ṭhalaite hruai :**

Isua Krista rinna chu a chhandamna leh khawngaihna te, duhsakna leh malsâwmna te chang tûra kan inpumpeka amaha kan innghahna hi a ni mai e, tiin a sawi theih a. A dik reng. Amaherawhchu, chumi hmunah chuan hahdam lutukin a ṭhut thluan reng theih a, chu ringawt chu he KṬP thiltum pakhatna hi chuan a tum a ni lo tlat. Lal Isua Krista ringtute chuan Amah ang deuh deuh tûra hma kan laka ke kan pen a phût zui. Chu chu a taka kalpui tûrin engtia hma lâk tûr nge, eng hunah nge, khawi hmunah nge tih pawh ngaihtuah tham tak a ni. Thu chu tisaah a lo chang ta ang khan, a taka kan hma lâk dân tûrah eng kawng nge kan zawh dawn le? A pâwng a pui chuan tih vak ngaihna hriat loh theih tak a ni ang. Ngaihtuah Chiang ila, a hranpaa tih theih leh tih tum ngaihna a awm chuang lo. Isua Krista rinna leh amah anna kawnga kala hma la tur chuan KṬP thiltum pahniha hian kan kalna tur kawng min kawhnmuh nghâl a ni.

2. **Kohhran kutke ni tûra ṭhalaite buatsaih :** Rawngbâwl tûra chhandamte'n Isua Krista rinna leh amah anna kawnga

kala hma la tûr chuan KṚP thiltum pahnihna, kohhran kutke ni tûra inbuatsaih a ngai. Chu lo chu kawng dang a awm vak chuang lo. Lo awm pawh ni se, a ziktluak lo zâwk ang. Kohhran hian hma lâkna kawng hrang hrang a nei a, chung tihlawhtling tur chuan kutke tûr a mamawh a, chumi atân kan pawimawh vek a ni. Fakna hla chuan, "I kut lo chu Lalpa'n kut dang a nei lo, i ke lo chu Lalpa'n ke dang a nei lo," a lo ti a. Ngunthlûk zâwka ngaihtuah chuan a dik kim chiah lo nain, rawngbâwl tûra mi tin pawimawhzia a sawina niin a lang a, hla tha tak a ni. A nihna takah erawh chuan, Lalpa rawng hi kan bâwl duh lo a nih pawhin Lalpa tân hmanraw tha dang a la tam lutuk. Chuti chung a khawngaih rawngbâwl tûra kan tling lo chung min duha min thlang ve hi a ropui êm êm a ni. Lâwm taka pawma, inthlahdah hauh lova theihtawp chhuah mai tûr kan ni.

Kohhran behchhan nei lo leh kohhran kaltlang lova rawngbawlna hi a tlo lo va, a nih tur ang a ni pha lo fo. Sadhu Sundar Singh-a khan inpêkna sâng tak leh ama duh dânin, kohhran

behchhan pawh nei lêm lovin zalên takin rawng a bâwl thîn a. A rawngbâwlna kha a ropuia a ngaihsânawm êm êm laiin mi tam tak chuan, "Kohhran behchhan neia rawngbâwl ni pheï se chuan kha ai khan a thleng sângin a rawngbâwlna pawh kha a ropui zâwk ang," an ti thîn. Chuvângin, kohhran kutkea țang zâwnga rawngbâwl hna kalpui tûra kan inkaihhruai zêl hi a țulin a pawimawh êm êm a ni. Kawng dangin Lalpa rawng hi a bâwl theih tho vang; mahse, Krista leh a kohhranah kan rawngbâwlna hi innghat tûra kan kalpui zêl a tha zâwk. Kohhran kutke ni tûra inbuatsaih tûrin eng kawng nge kan zawh leh tâk ang le? Chu chu KṚP thiltum pathumna hian a rawn chhâng leh chiah a ni.

3. Kohhran hnathawh tihpuitlin : Kohhran hian hna leh țul hrang hrang a nei a. Rawngbâwlna pêng hrang hrang hmangin chu chu a thawk thîn. Chung rawngbâwlna zînga a eng emaw talah chuan țangkai ve theihna i nei ang em? A engah mah tel lova i ngaihsak lo a nih chuan kohhran hnathawh tihpuitlinna kawngah

hma i la lo tihna a ni ang. Kohhran chuan mi mal nun siam that hna a thawk a, chhungkaw rem fel leh kalhmang tha a awm theih nân a beini a zirtîr a, vantlâng tâna thil tha leh hmasâwnna tûr ngaihtuahin a thawk bawka, ram leh hnam thatna tûra hma lain, khawvêl leh a chhûnga thil awm zawng zawng thatna tûrte ngaihtuahin a thawk thin. Chumi piah lamah pawh thlarau khawvêl, lei piah lam rama thih hnua chenna tûr hmun tha kan chan theih nâna thawktu awm chhun a ni bawka. Chung kohhran hnathawh tipuitling tûr chuan hma kan lâk a ngai a ni. Hnathawh tûr chi hrang hrang awmah kan hna pui phei chu kan thlahthlam hauh loh tûr a ni. Kohhran hna pui chu eng nge ni kan tih chuan, pawimawh êm êm chu KṚP thiltum palina – Krista Chanchin Ṭha puan darh hi a ni.

4. Krista Chanchin Ṭha puan darh : Kohhranin hna a ngahzia leh a mawhphurhna tamzia kan sawi nual tawh a. Chung hna hrang hrang chuan a tum bulpui ber chu Krista Chanchin Ṭhain mihringte sual ata a chhuah zalenna tur leh, chumi zar zova chatuan nunna thlenga an neih

theihna tura thawh a ni a. Chu chu he KṚP thiltum palina 'Krista Chanchin Ṭha puan darh' hi a ni. Sunday School-a Pathian thu leh nun kawng dik kan inzirtir zawng zawngte hian chu chu a kawka. Kohhran, KṚP, Pavalai, Kohhran Hmeichhia leh kohhran hnuaia Sub-Committee hrang hrangte'n kan hna thawh chi hrang hrang hian a kawka vek tur a ni bawka. Chuti lova keimahni hlimhlawp leh nuam tih zawng ringawta thil kalpui kan tum chuan kan tum ram kan thleng thei dawn lo a ni.

Ringlomite'n Isua Krista hi Lal leh Chhandamtua an pawm theihna tura kan beihna zawng zawng hi Krista Chanchin Ṭha puan darhna a ni vek. Inpekna nasa leh Krista hmangaihna a tih luihna dawngtute'n mahni in lum leh chhungte kalsanin hmun hla leh hrehawm zawkah he Chanchin Ṭha hi an feh chhuahpui a, 'Hrehawm mah se i ta ka ni Lalpa,' tiin lawm takin an thawk mek. Anni hi kawng engkimah kan thlawp tlat a ngai. Ṭawngṭaiin, thilpekin, tha leh zung seng pawhin i thlawp tlat ang u. Tualchhung aṭanga ṭan kan lakpui ve loh chuan a

sawt tur angin an thawk sawt thei lo vang. Hawh u, i inthlahdah hauh lo vang u. 'Kan inthlahdah loh zawngin a hun takah kan seng dawn si a,' tih a nih kha. Rawngbawl tura chhandam kan nih avangin lawm chungin rawng i bawl zel ang u. Mi dangte pawhin an bawl ve theih nan anmahni chhanchhuahna hna i thawk mawlh mawlh ang u.

Bible-a chuang thu ziak hrang hrangte hi a ziaktute'n an ziak lai khan, "Khawi nge, Pathian aṅanga ka thu dawn, ṅha tak takte hi ka ziak ang a, nakinah chuan a buin an la siam ang a, Kristiante'n an lehkhabu thianghlim atan an la hmang ang a," tiin an ngaihtuah lawk hauh lo vang. Mahse, an thu ziaakte chu heti hian Bible-ah a chuang a, ringtute'n inngah nan kan hmang ṅangtai ta em em a. Chutiang deuh chuan KṽP dintute khan KṽP thupui leh thiltumte an buatsaih lai khan hetiang taka inlalawn nalh leh dik tur hian a hranpain ngaih-tuahna an seng tehchiamin ka ring lo. Pathian ṅanpuina leh Thlarau kaihhruainain an tum teh run pawh ni chuang lovin,

hetiang hian a lo chhuak ta mai a nih ka ring. Mahse, tuna kan chhui dan anga han chhui chian hian a lo inlalawn nalh em em mai si a. Chuvangin, kan kohhrana KṽP lo ding hi chung lam duh dan leh a kaihhruaina ngeia thleng a nih a rinawm tlat a ni.

Tichuan, a kalphung leh he pawla kan tel danah pawl dang nen chuan a inang lo hle turah a ngaih theihin ka hre ṅhin. Tuna KṽP member ni mekte pawh hian hei hi kan hriat reng a ṅul ang. Mahni nuam tih zawng leh hlimhlawp um zawnga KṽP-a tel kan tum chuan kan ti fuh hauh lo vang tih a hlauhawm. KṽP hi pawlah pawh pawl namai a ni lo tih i hria ang u.

KṽP chang inngahna, Ephesi 2:10, "Thil ṅha ti atan Krista Isuaah chuan siama awmin ama kutchhuak kan ni si a; chu thil ṅha tih chu kan awmna turin Pathianin a buatsaih lawk a ni," a tih ang khan, KṽP hi kan hruaitu hmasate din leh kutchhuak mai ni lovin, Krista Isua kutchhuak, amaha siam, amaha awm reng tur leh a hna thawk zui tura ding a ni tih i hre reng ang u.

Work Camp Report :

Gharmurra



Amed Veng Branch Kristian Ṭhalai Pawl chuan kum 2016 khan kum sawmnga kan tling ve ta reng mai a. Kan kum sawmnga tlin lawm nan hian thil chhin-chhiah tlak deuh eng emaw tih ṭhain kan hria a, chumi avang chuan ramthar lamah kan unau ringtute Pathian biao an inkhawm na tur biak in sak ṭha kan ti a. Ramthar lama biak in sak ṭulna hmun kan zawn kual hnuah Doctapur, Kahrawt Bial, Cachar tlangramah biak in sak kan tum ve ta a. Kan sakna hmun turah hian biak in sakna hmanraw lei nan pawisa kan thawn lawk a, hmanrua an lak khawm fel veleha biak in saa kal turin kan inbuatsaih a. Hetia Doctapur lama kan unau ringtute leh Synod hnathawktuten biak in sak nana hmanrua an han la khawm vel chu Doctapur-a ringlomiten an hmuh chuan, an khuaa Pathian Biak In sak chu rem an ti lo va, an khaw pawn lama ringlomite punin

biak in sak kan tum chu an dodal a.

September ni 26, 2016 (Thawḥṭanni)-a Work Camp-a kal mai tum tawh chuan he thu hi a hma ni, September ni 25, 2016 (Pathianni) zingkarah kan hre ta mai a! Kalna tur engkim tihfel sa, a hmuna kan ei leh in tur pawh lei fel vek tawh, member kal tumte pawh mahni hnathawhnaa chawlh la tawhte an nih hlawm avangin kan hrilh a hai khawp mai a. Amaherawh-chu, khu lama kan hotute, kan Administrative Secretary te, Kahrawt Bial Pastor te leh kan missionary-te nena inrawn chungin, biak in hi sak dan kawng a awm mial beiseiin work camp-a kan kal hun tura kan ruahman, September ni 26, 2016 (Thawḥṭanni) zing dar 5:50-ah member 42-te chu bus pahnihin kan chhuak ve ta rawih a.

Tluang taka kan kal zel hnuin Assam ram tawn tirh, Mayopur-ah Doctapur-a kan missionary thawk laiin min lo hmuak a, kan kal tumna ram vel a ralmuan vak loh avangin bus hmaa banner kan tar te chu kan hlip thla a, Doctapur

ah pawh kal ta lovin Gharmurra Mission Compound-ah chhun dar 12:30-ah kan tlan lut ta rawih a (Gharmurra Mission Compound leh Doctapur hi km. 7 vela inhlat a ni a. Doctapur hi Gharmurra thlen hmain a peng a, peng aţang pheii chuan km. 2 vel chauhva hla a ni) Gharmurra Mission Compound-ah chuan Kahrawt Bial Pastor te, Doctapur lama kan Kristianpui thenkhat te leh kan missionary te nen inrawn khawmin, kan thlen ni hi chuan biak in sa tur hian Doctapur lamah kal rih loh mai ni se kan ti a. Kan Branch OB thenkhat te, Kahrawt Bial Pastor te leh khu laia thawktu dang leh kan Kristianpuite chu kan thlen hnu lawk hian Gharmurra Mission Compound aţangin Doctapur lamah pheii, biak in sak theih dan tur zawngin, Doctapur khuaa biak in sak dodaltute chu an va kawm a. Hetih lai hian member tam zawkte chuan Gharmurra Mission Compound chhunga thawh tur ʔul awm ang ang an lo thawk bawka. Tlai lamah Doctapur lama kan hruaitu va

kalte chu Gharmurra Mission Compound lamah rawn let lehin, boruak awm dan an va thlithlaina aţangin tun dinhmunah chuan biak in sak chi niin kan ngai ta lo a ni.

Gharmurra Mission Compound-ah hian sikul sak lai a awm a. Mistiri chhawr tur an awm loh avangin hna laklawh deuh deuh, la thawh zawh loh a awm nual a. Biak in kan sak theih tak lohvah chuan he hna hi Pathianin min pek a tum zawk a ni ang e tih rilru puin, phur takin tukverh frame vuah, kawngkharpuin vuah, leivung paih, sikul bang rawng hnawih, Staff Room pindan siam leh toilet chung siam te thawk turin kan rilru kan siam ta a ni.

Gharmurra Mission Compound-ah chuan kan riak ta a. Gharmurra kan thlen tlai hian hna kan thawk nual hman a. A tuk zing dar 5:00 aţanga hna thawk ʔan lehin tlai dar 6:00 thleng kan thawk leh a. Hemi zan hian kan thawh bak chu a tuk chawhma lama thawh zawha, chawhnu lamah chuan haw

theih mai inbeiseiin zan kan mu a. A tuk, ni 28.9.2016 (Nilaini) zing dar 5:00 ațangin hna kan thawk țan leh a, 9:40 am-ah kan kan thawk zo a ni. Gharmurra Mission Compound-ah hian ni 26.9.2016 țlai dar 3:00 ațanga ni 28.9.2016 zing dar 9:40 chhung chauh hna hi kan thawk nain, Pathianin kan tha te a tichak a, inhliam leh intipalh awm lovin tluang takin Pathian kaihhruaina azarah sikul tukverh frame 59 leh kawng-kharpui khar 9 kan vuah hman a, Staff Room bang rawng te hnawihin, Headmaster pindan kan siam a, toilet chung rangva chihin leivung trip 4 kan paih hman bawka ni. Hna kan zawh hnu chuan tukțhuan kan ei a, chhun dar 12:10-ah Gharmurra Mission Compound chhuahsanin, zan dar 8:30-ah tluang takin in kan thleng a ni.

Gharmurra Mission Compound-ah hian thawktuten kum kal ta lam daihah khan Mizoram lamah tukverh frame te order-in, vuah mai theih turin an lo kawl sa tawh a, an tukverh frame te hi mawih hlauhawm tak mai te a lo ni tawh hlawm a, an awmna lamah mistiri han chhawr mai tur te an hmuh zawh loh avangin, work camp-a thawktu tur an mamawh lai tak a lo ni a. An țawngțaina chhanna hmanruaa Pathianin Armed Veng Branch KTP te min hmang duh hi kan lawm hle mai a. Khu lama thawktuten kan cham chhung zawngin țha takin min lo mikhual a, min duhsakna kan lawm hle bawka ni. Hetianga Pathianin min hruai hi kan lawm takmeuh a ni.

– Ps. L. Ramhluna
Work Camp Secretary



- *I thiamna leh finna ni lovin, i rilru put hmang khan i thlen sang zâwng a hril ang.*
– Zig Ziglar
- *Harsatna tinreng hian amah inching fel turin thuruk a pai. Harsatna i tawng ngai lo a nih chuan chu thuruk inthup chu i man ngai lo vang.*
– Norman Vincent Peale

HRISELNA ■■■

Meizialah hian eng nge awm?

Meizial pakhatah hian chemical (bawlhlo) chi hrang hrang 600 bawr vel a awm niin American Lung Association chuan a sawi a. Meizial hi zuk dawna an ðan chiah hian chung bawlhlo 600 chu 7,000 dawnah a insiam leh ðhin a ni tih an sawi bawk. Bawlhlo tam zawk hi tur hlauhawm tak tak a nih mai bakah 7,000 zinga 69 dawn chuan cancer chi hrang hrang an siam bawk a. Heng chemical (bawlhlo) hlauhawm tak tak hi thil siam nan hman a ni ðhin a; mahse, chungachte chuan chemical (bawlhlo) a tel thu leh a hlauhawmzia chiang takin an ziak fo va. Mahse, meizialah chuan ziah a ni ve lem lo.

Chung chemical (bawlhlo), meiziala awmte chu han thlir hoila:

1. Acetone – tin hnawihsen tihrehna siam nan an hmang.
2. Acetic Acid – sam dumnaah an hmang.
3. Ammonia – in chhung bungrua tihfai nan an hmang.

4. Arsenic – sazu tur atan an hmang.
5. Benzene – dendrite anga thil charna siam nan an hmang.
6. Butane – cigarette lighter tui siam nan an hmang.
7. Cadmium – battery acid siam nan an hmang.
8. Carbon monoxide – motor khu.
9. Formaldehyde – mihring/ ran thi tawh ðawih lo tura siam nan an hmang.
10. Hexamine – gas lighter tui siam nan an hmang.
11. Lead – battery siam nan an hmang.
12. Naphthalene – Kapoor siam nan an hmang.
13. Methanol – rocket petrol siam nan an hmang.
14. Nicotine – rannung tur atan an hmang.
15. Tar – alkatra, kawng siam nan an hmang.
16. Toluene – rawng siam nan an hmang.

Heng bawlhlo chi hrang hrang hi mi thiamten research an tih a ðanga an hriat chin a ni a, an hriat bakah pawh meizialah hian taksa tana ðha lem lo dang tam tak a awm thei bawk awm e. Chutih rualin Mizoram mai

pawh ni lo, khawvel hmun khawi lai maiah pawh hian meizialin thalai tam tak a tibuai meka. Damdawi ngawl vei ang em hi chuan pawl kan ti lo chungin, kan ramah hian damdawi ngawl vei aiin meizial ngawl vei an tam zawk a ang. National Family Health Survey-3 chuan Mizoram chhunga Mizo mipate zingah 100 zela 73.6 chu meizial zu thin an ni a ti a, hei hi India ram pum lak khawm (32.1%) ai pawhin a sang fal hle a ni.

Hmeichhe lamah 100 zela 16.1-ten meizial an zu thin niin an report bawk. Chutiang bawkin khawvel pum huapa vaihlo hman nasat dan zir chianna, GATS (Global Adult Tobacco Survey) hnunngung berah khan India ramah Mizoram chu vaihlo hman nasa ber state kan ni tih an hmuchhuak a. Zir chiannaah chuan Mizote zingah 100 zela 70 dawn chuan vaihlo kan hman thin a lo ni a. Chungte chu – a zuk chi te, a hmuam leh ei chi ang zawng ten a then theih ang. Heng vaihlo chi hrang hrang hman mekte hi mipa zingah 100 zelah 72, hmeichhe zingah 100 zelah 62 an ni.

Mizote, a bikin thalai zingah meizial zu kan tamzia chu research leh survey chi hrang hrang hian a rawn tichiang thawkhat awm e. Meizial zuk avanga natna lo awm theite kan lo hriat nawn leh atan:

1. *Cancer* : Meizial zuk hian chuap cancer, hrawk cancer, ka chhung cancer, chaw kawng cancer, pumpui cancer, pancreas cancer, kal cancer leh phing cancer te a thlen thei a ni tih mi thiamten an hmuchhuak tawh a. Hei hi kan ngaih pawimawh a tha hle mai. Mizoram hi India ramah vaihlo hman uar berna state a ni a, cancer vei tam berna state a ni bawk. Tin, Mizoroma kan cancer vei tam ber hi chuap cancer, hrawk cancer, chaw kawng cancer, ka chhung cancer leh pumpui cancer a ni.

2. *Cardiovascular diseases (lung leh thisen zam natna)* : Heart attack 100 zela 30 dawn hi meizial zuk vang a ni a. Chu bakah chuan stroke te, aortic aneurysm te (kawchhunga thisen zam lian 'aorta' puar), peripheral vascular disease (thisen zam teho natna – ke leh kut tan ngai hial pawhin a awm thei) te a thlen thei bawk.

3. *Chronic Obstructive Pulmonary Disease (Chuap lam natna)* : Miin mei a zuk hian chuapah 'inflammation' a lo awm a. Chu chuan chuap chu elastic rul ang deuhvin a siam a, chuap chu kan thawk chhuah zawnga thep tha thei tawh lovin a lo awm a. Chutichuan, kan taksa tana gas tha lo (e.g. carbon dioxide) te chu paih chhuah theih lohvin a awmtir ta thin a. A chung a 'inflammation' kan tih khi miin regular-a mei a zuk tan hnu kum hnih atangin a awm tan tlangpui a. A tirah chuan khuh leh khak tlem tlem an nei a, chuan a lo rei a, a zuk zel chuan thaw hah (breathlessness) a nei a, a nasat viau hnuah pheih chuan heart failure te a nei ta thin a ni. Mizo zingah COPD hi thihpui kan tam hle a ni.

4. Nu nau paiin mei a zuk thin chuan thisen put te, nau hlam awmna fuh lo te a awm duh a. Tin, nau chhiat a awlsam bik baw. Chu bakah chuan thla kim lova nau piang a awm duh baw.

Tin, vaihlo hman hian mihring min tilang tar hmian thisen a heh a, ti a nung thei lo va, taksa a tirimchhia a, tin leh ha a tibâl duh baw. Miin mei

zu lo mah se, mei zu bula a awm fo chuan kan sawi tak natnate kha a vei ve theih tho avangin fimkhur a tha hle.

Naupangah pheih chuan in chungkhura mei zu bula an chen chuan respiratory infection (hritlang awmna) leh asthma-te a awm duh bik a. Chuvangin, meizuk hi a zu-ate tan chauh ni lo, an bula awmte tan pawh a hlauhawm a ni tih kan hriat renga, ti lo tura tan kan lak a pawimawh hle awm e.

Bible-ah ringtute tan chuan kan taksa hi Thlarau Thianghlim in a nih thu chiang takin kan hmua (1 Kor. 6:19-20). Mana lei kan nih tawh avang leh mahni ta kan nih tawh loh avangin, kan taksa pawh a tichhe lam zawnga kan hman a rem hmel loh. Damdawi ngawl vei nih kan duh loh ang bawkin meizial ngawl vei nih te hi duh lo ngam ila. Kristian thalaite he lamah hian tang thar leh ta ila. Rilru, taksa leh thlarau hrisel kan lo neih mai bakah, Mizoram pum pawhin hriselna kawngah hma kan sawn ngei ang.

– Dr. Lalchhanhima Ralte, MPH
(Master of Public Health)
Synod Hospital, Durtlang.

RIMAWI ■■■

Zaipawl rawngbawlna ngaihhlut

– H. Lal̄thazuala (Puia)
Synod Music Instructor

Mizote hi Kristian kan nih hma ātang tawh khan zai ngaina leh ngaihlu tak hnam kan ni tih a chiang. Zu hmun sa hmuna kan awm lai te, thingbul leh lungbul biao, ramhuai hlauva kan awm hun lai te tawh pawh khan zai hi Mizote nunah a bet tlat tawh ti ila, kan sawi sual lo vang. K̄utni vangthlaah pawh chaia, lama zai th̄in kan ni. Tun hnu deuhva han ngaihluah pawn khatiang huna a huhova kan lo zai ang chi pawh kha zaipawl chi khat a ni ti ila a sual thui em em lo vang chu.

Zoramah Kristianna a lo luh ātang khan kan Zosap missionary-te kha music thiam, hla lam thiam mi, zai thiam, hla phuah mi an lo ni lehzel baw si a. Mizote zai ngaina leh zai nuam ti mi kan nih hre reingin, thu leh hla hmangin Chanchin Ṭha an hril ta zel a, hun rei lo teah Kristianna a lo darh ta zel a ni. Fakna hla chuan Kristiante zingah hmun a chang thuk tial tial a, kohhran lo ding zelah fakna chuan hmun thuk ber a luah ta zel

a. Zaipawl kan tih ṭawngkam lar tak pawh hi Mizo Kristiante hian eng tik hun laiin nge kan lo hman ṭan tih chiang taka sawi har mah se, a lo chhuah ṭanna ni awm ber chu kum 1912 Krismas laia Pu Ch. Pasena leh Pu Rozika-ten zaipawl an huaihawt kha a ni ber a. He thu hi Pu Lianhmingthanga, Thakthing Venga miin ni 31.12.1912-ah a ziak a. Chutah chuan 'Hla sak mawi' tiin a ziak a. Zaipawl tih ṭawngkam hi an la hmang lo va, he ṭawngkam hi zaipawl a sawina ni ngeia ngaih a ni.

Zaipawl tih hi Sap ṭawngah chuan 'Choir' tih a ni a, chu chu "A band of singers in a church" tihna a ni. A awmzia chu biak ina zaiho, a bika intiamruhalho tihna a ni mai awm e. Zaipawl tih ṭawngkam hi an hman ṭan hun tak hre chiah lo mah ila, kum 1920 hma hret pawh a ni thei a, kum 1920 velah kha chuan an hmang lar tawh ngeiin a lang. Zaipawl din hnua zin chhuah hmasak ber chu kum 1925, Sentlang khuua Bial inkhawma Zosap Pi Zaii hova an zai ṭum kha a ni. Tin, Mission Veng Kohhran Zaipawl hi Kohhran Zaipawl zik chhuahna hmun a ni baw. Heng hunah hian zaipawl chu Mission Vengah chauh lo pawh neih chakna a lo chhuak ṭan a. Hetah hian Tirhkohte leh Zirtirtu (Mission hnua veka thawk)-te hi an ṭangkai em em a, heng mite kaihhruaina hian zaipawl chu a darh ta zel a ni ber.

Kum za chuanga lo liam hnu chuan, khawvel thiamna leh changkana tinrengin min chim nasat tak vang pawh a ni thei, zaipawl rawngbawlna kan ngaihhlut dan pawh a dal ta hret hret niin a ngaih theih. Zaipawl rawngbawlna a tlachhe ta vek e tihna lam chu a ni lo, zaipawl chu kohhran tin leh bial tin deuthawin kan la nei reng tho. Mahse, ngaihhlutna lo tlahniam mek hi tun aia ngaihlu leh zual tura inzirtirna leh hma thar lakna lam a ni. Zaipawl han tihah pawh hian Kohhran Zaipawl han kawhtir deuh bik ta ila, a chhan chu zaipawl rawngbawlna dang chu thlan bik an nih deuh zel avangin. Mahse, sawi kawpin khai khawm pawh ni ila a sual thui lutuk lo vah ngai ang. Zaipawl rawngbawlna ngaihhlut chungchang chu kawng hrang hrangin han chhui zau ta ila:

Zaipawl rawngbawlna ngaihhlut tawh lohna chhan:

Tun hma kan hriat phak ve chinah pawh zaipawl kan ngaihsanzia te, kohhran zaipawl zai tur kan nghahhlehl thinzia te, Bial Zaipawl zai dawn pheichuan inkhawm loh kan hlauh thinzia te, zaipawl member nih kan chaka tel nuam kan tih dan te chhut let chuan tun dinhmun nen chuan a van inang ta lo em! KṚP-a inhmang chin tawh phawt chuan kohhran zaipawla tel ngei ngei

tura inngaihna kan neih hun lai te chhut letin, tunah chuan a danglam ta mang e! KṚP member chu sawi loh, hruaitu zingah pawh zaipawla tel tum tlat lo, tel loh pawh zak chuang reng reng lo kan tam ta lutuk bawh. Eng vang ber nge ni ta ang le?

A chhan tam tak sawi tur a awm a; mahse, tawi tein han tar lang ila.

1. Zaipawl rawngbawlna hlutzia leh pawimawhzia kan hre tawh lo.
2. Kohhran mi tak nihna kan nei lo va, khawvel thil nen kan hmer kawp nasat lutuk vang.
3. Tunlai khawvel changkannain a ken thil tam takin kan nun a ei nasat lutuk vang.
4. Keimahni nawmna leh hlimna ngaihtuah lutuk vang.
5. Hrehawm tuar leh chān huama rawngbawh ai chuan mahni hlimna ngaih pawimawh lutuk vang.
6. Pathian tak aia khawvel thil nawmchenna kan tlan nasat lutuk vang.

Heng lo pawh hi sawi tur tam tak a awm. Heng kan sawi tak mai pawh hian kan zaipawl rawngbawlna thlengin min nghawng a. Zaipawl ngaihhlutna pawh a lo tlahniam ta hle mai. Kohhran mi zawng zawngte pawh hian ṫan lak kan ngai ta hle mai. I inbih Chiang theuh ang u khai.

Ngaihhlut tur ber hriat chian

Zaipawl han tih mai hi chuan Pathian fak leh chawimawina kher lo, khawvel lam thil atan pawh zaipawl a tam thei viau awm e. Zaipawl tih ṭawngkam hi Kristian sakhuana aṭanga lo chhuak a ni ti ila kan sawi soal lo vang. Tuna kan sawi tum ber hi chu Pathian fak leh chawimawina, rawngbawl naa zaipawl ngaihhlut a ni.

Zaipawl rawngbawl na ngaihlu tur chuan zaipawl rawngbawl na pawimawhzia leh zai rawngbawl naa kan zai chhan kan hriat chian hmasak a ngai. Bible hi Genesis aṭanga Thupuan thleng kan chhiar chuan mihringte tih tur leh dam chhan chu Pathian fak mai tur a nihzia a lang chiang hle. Sam ziaktu pheii chuan 'Engkim thaw thei tawh phawt chuan Lalpa chu fak rawh se, Lalpa chu fak rawh u," tiin thupek a siam tawp mai a ni. Kan fakna chhan chu lei leh van siamtu, mihring awm lo ata awma min dintu, bawhchhiatna suala kan tlu pawh min chhandamtu, amah ringtute hun tawpa a hnena min hruaitu tur chu Pathian a nih vang a ni. Tin, mihringte hian a ropuizia puang chhuak tura thil awlsam ber chu amah faka zai mai hi a ni. Mihringten Pathian hi fak tur kan nihzia hre fiah tak tak ila chuan amah faka zaipawl rawngbawl na hi kan ngaihhlut zual zel a rinawm. Ringtu, Pathian rawngbawltu inti tan chuan Lalpa faka zai hi tih makmawh a ni.

Heti zawng hian sawi leh ila.

1. Zaipawl rawngbawl na hi kohhran hmel lanna leh kohhran chakleh chak lo tehna pawimawh tak pakhat a ni.
2. KṬP rawngbawl na a tlangnel tak leh neitu taka bul kan ṭana, kan awm theihna chhan ber pakhat chu zaipawl rawngbawl na vang a ni.
3. Khawvela zaithiam lar tak tak leh he kan Zoram ngeiah pawh, zaithiam lar tam zawkte lo chhuahna chu kohhran huang chhunga zaipawl rawngbawl na aṭangin a ni deuh zel.

Chuvangin, kan ngaihhlut tur zaipawl hi kan hriat chian hle a ngai. Heti zawng hian tlein i'n chhui zau leh teh ang:

Zaipawl/Fak hla sak hi sual hnehna ralthuam a ni

Bible-a 2 Chronicles 20:1-30 kan chhiar chuan, Juda lal Jehosaphata chu an hmelmaten an rawn do dawn a, lal chuan a hmelmate chu a hlau hle a, hneh thei turah a inngai lo. Mahse, a hmai lei siin a bawkkhup a, Pathian hnenah a ṭawngṭai a. Nakinah chuan a sipaite hman turin zaipawl a ruai ta a, an hla sak tur chu, "Lalpa hnenah lawm thu sawi rawh u, a ngilneihna chu kumkhuain a awm dawn si a," tih hi a ni. Zaipawl chuan hla an sak veleh an hmelmate chu an tlawm

ta a ni tih kan hria. Zaipawlte Pathian faka kan zai hi hmelma Setana kan hnehna ralthuam a ni tih a Chiang hle.

Zaipawl/Fak hla sak hi Pathian hnena lawm thu sawina a ni

Bible-a Exodus 15:1–21 kan en chuan, Israel-ten an hruaitu Mosia hova mak tak maia Tuipui Sen an kan khan Mosia hovin mipuite chuan hla an sa rual a. Miriami leh hmeichhe dangte pawhin zaipawl dinin lawm thu sawina hla an sa baw. Keini kohhrana rawng-bawltute leh ringtute hian Pathianin soal lakah min chhandam a, tisa leh thlarauvah malsawmna tam takin ni tin min vur baw. Chuvangin, Lalpa hnena lawm thu sawi nan amah fakin kan zai th̄in tur a ni.

Zaipawl/Fak hla sak hi sal tang chhuahna a ni

Bible-a Tirkhohte 16:16–40 kan en chuan, Paula leh Sila chu lung inah an tanga. Nimahsela, zanlaih hlim takin hla an sa a, mitangten an ngaithla a. Mak tak maiin tan in kawngkhar a rawn inhawng a, an kaw l bunte chu a rawn inphelh ta a ni. Pathian faka zaipawlte kan zai hi lungngaihna leh beidawanna khura tang mekte tan pawh zalenna, thlamuanna, hlimna, chhandamna leh beiseina thar thlentun a ni thei tih he lai bung leh changah hian a Chiang hle.

Zaipawl hi vanin lei a present hmasak ber a ni

Luka 2:14 kan en chuan, Lal Isua a lo pian khan van aṅangin zaipawl an lo chhuk a, "Chungnung berah Pathian ropui takin awm rawh se, Lei chung a lawm em em mihringte hnenah rem thu leng rawh se," tiin hla an rawn rem a nih kha. Vanin zaipawl hi lei a present hmasa ber a ni. Keini ringtute hian Lalpa kan faka kan thinlunga ni tin lo piang lawmna chu zaipawl hmanga amah faka zai hi a ni.

Zaipawl rawngbawlna hi tisa leh thlarau damna a ni

Zaipawl zai ngaihthlak ringawt vanga tisa leh thlarau damna chang tam taksawit tur awm zingah tlem te han tar lang ila. "Aw hmangaihna" tih hla KṪP General Conference hla bua mi, Bial Zaipawlten an sak avanga hnam dang zingah leh Mizo ngei zingah pawh Thlarau Thianghlim harhna a thlen tak thu leh tisa damna pawh chan phah ta sawi tur a awm. Chu mai bakah, hla lar tak pakhat, 'Ka duh ber Lalpa' tih hla sak avanga tisa leh thlarau damna chang tam tak sawi tur an awm baw. Tin, Kohhran Zaipawl hla zir thawm aṅanga zu rui pakhatin thlarau damna a chan thu pawh sawi tur a awm. Hei mai bakah, Synod Choir Album, 'Pathian hmel' tih hla avanga tisa leh thlarauva damna

chang sawi tur an awm baw. Tin, hei hi sawi hmaih phal chi a ni lo: tun hnai maia thil thleng a ni a, mi pakhat harsatna tam tak avanga inawh hlum tum, a nghawnga hrui valh mek tawh chu, 'Lal thutthleng kiangah' tih hla Synod Choir-in an sak, mi play a hriat avanga inlamleta thlarau damna chang zui ta a awm baw. Hei lo pawh hi sawi tur tam tak a awm a, sawi sen a ni lo. Hemi rual hian fakna thiltihtheihna chungchang pawh sawi a chakawm hle a; mahse, a leng rih lovah ngai ang.

St. Augustine-a chuan, "Hla sak hi ÷awngtai wawi hnih hu a ni," a ti. Thuhriilu ropui D.L. Moody-a chuan, "I ÷ah chuan hlain a ÷ahpui che ang a, i hlim pawhin hla bawkin a hlimpui ang che," a ti. Carlyle-a chuan, "Hla hi angel aw a ni," a ti baw.

TLANGKAWMNA

Mizo Kohhranah hian kohhran tinin zaipawl kan nei deuh vek a, zaipawl kan tih reng lai hian a ngaihhlutna lamah ÷an kan lak thar a ngai hle. A bikin Kohhran Zaipawl member tur phei chuan a tlangpuiin thlan bik, ruat bik, sawm bik kan awm lo. A duh apiang tana tel theih a ni ber a, zai thiam leh thiam loh hi tehna tur leh tel lo tura insawi thiamna tur a tling lo. Kan peih emaw, peih lo emaw, kan dama kan hman a nih

chuan, kan zai chhan leh tel ve chhan hriat chianna a ÷angin tel mai tur kan ni. A bikin KÏP Branch leh Group hruaitute pawh kan inbih chian a ÷ul mang e! Kan hruai member-ten zaipawl rawngbawlna an ngaihhluta, a chhan an hriat fiah theih nana hruaitu tur kan ni tih i hre reng ang u.

Sawi tak angin, zaipawl rawngbawlna hian kohhran a tinung a, a tichak a, a tiropui a, kan hmelma sual doral kan hnehna hmanrua a ni. Pathian kan fakna leh chawimawina ropui ber pakhat a nihzia te, mi lungngai leh mangang, ÷ahna leh beidawna ruama awmte tana thlamuanna a nihzia te, tisa leh thlarauva damna thlentu a nihzia te leh Lalpa hnena lawm thu kan sawina hmanrua a nih avang hian, zaipawl rawngbawlnaah hian ÷an i la thar ang u. Zaipawl kan zai te hi angel aw a lo ni reng tihna a nih chu. Thusawi thiam chu mi tlem te an awm a, a bak thusawi thiam kher lo chuan Pathian ropuina puang chhuaka tar lang tur chuan amah faka zai mai hi kan tih tur pawimawh tak a ni. Hlain, "Amah fak mai loh zawng hlimna dang a awm lo," a tih kha. Chu vangchuan, zaipawl rawngbawlna hi chak zawk leh nung zawka a kal zel theih nan, I NGAIHLU thar zel ang u.



KANTU

Lawngtlai Bazar Branch

Ristian Thalai Pawl, Lawngtlai Bazar Branch hi July ni 18, 1993-ah din ÷an a ni a. Tunah hian member mipa 91 leh hmeichhia 67, an vaiin member 158 an awm mek a. Kum 2017 hian Committee member - kohhran aiawh leh Bialtu Pastor-te telin 17 an awm a ni. Branch hnuaiah hian sub-committee hrang hrang – Evangelical Cell, Reception & Ushering, Banner & Decoration, Property and Sound leh Refreshment Sub-committee-te din a ni.

Thawhtan zan inkhawmah hian sermon, sharing leh kum puan thupui zir tea hun hman ÷hin a ni. Tin, Pathianni tlaiah fellowship neih ÷hin a ni a, Thawhleleh zan leh Ningani zanah Evangelical Cell Sub-committee hmalaknain Branch pum huapin member-te inah feh chhuah ÷hin a ni. Tin, Bial chhung branch hrang hrangte intihchaka intihphur tawn nan intlawh kual ÷hin a ni bawk. Kumina Branch-in biala budget an neih chu Rs. 36,000/- a ni. Nakkum 2018 hi Branch Silver

Jubilee Kum a nih dawn avangin a ÷ul dan anga inbuatsaih mek zel a ni. Group pahnih – Mosia Group leh Joshua Group-ahte in÷hen a ni a. Thawhtan zan inkhawm, kohhran inkhawm hrang hrang leh Branch leh kohhran hnatanlang te, fellowship attendance-ah te inel ÷hin a ni. Branch intihhlim nan sports neih ÷hin a ni bawk. Group budget hi Rs. 30,000/- a ni. Tin, KTP member zir lai ti÷hate lawmpuina citation hlan ÷hin a ni. Tin, faith promise, group budget, sangha zawrh, blanket suk leh thil dang dang hmangin sum an tuak ÷hin bawk.

Lawngtlai Bazar Branch a÷ang hian missionary pali – Synod Mission Board hnuaiah pathum leh Home Mission South hnuaiah pakhat an chhuak mek a ni.

Kohhran zaipawl hla zir hun nghet atan Thawhtan zan inkhawm ban hi neih a ni a. Kohhran ni pawimawh, Pastor bial fan leh Presbytery Inkhawmpuiahte zaia rawngbawl thin a ni.

Keimahni



■ **DAWRPUI BIAL** : January 22, 2017 (Pathianni) chawhnu khan Dawrpui Bial Diamond Jubilee lawmna Dawrpui Kohhran Biak Ina neih hmanpuiin, Leader Rev. Zothansangan thuchah a sawi. Inkhawm banah jubilee dar vuak a ni a, jubilee ruai an kil ho nghal bawk. Leader hi Ramhlun North Bial KṚP aiawh mi pahnhin an ṭawiawm a ni.

■ **KHAWKAWN BRANCH** : February 15-16, 2017 khan Khawkawn Branch Diamond Jubilee hmanpuiin Pu Lalhnehzova leh T.Upa H. Ramnunsanga-te an kal. February 15 zan Variety programme-ah T.Upa H. Ramnunsangan KṚP Chanchin (souvenir) a tlangzarh a, a tuk Jubilee Ni zan inkhawmah Pu Lalhnehzovan thuchah a sawi. Bial KṚP hruaitute nen inkawm hona hun ṭha tak an hmang.

■ **CHHIAHTLANG HMAR VENG BRANCH** : February 17, 2017 khan Chhiahtlang Hmar Veng Branch Golden Jubilee lawmna hmanpuiin Pu Vanlalpeka (Finance Secy.) leh T.Upa P.C. Lalropuia-te an kal a. February ni 17 (Zirtawpni) chawhma inkhawmah T.Upa P.C. Lalropuia jubilee thupui, 'Zalenna' tih a sawi a, zan inkhawm ban fellowship-ah Pu Vanlalpekan thu tawi a sawi bawk.

■ **KṚP ROREL INKHAWM THLENGTU TUR NEN INKAWMNA** : February 9, 2017 zan khan KṚP Rorel Inkhawm 2017 thlengtu tur KṚP Rorel Inkhawm Organizing Committee (Bawngkawn Kohhran)-in min sawm angin CKṚP OB – T.Upa Ngurhmingliana, Upa Zonunmawia (GS), Pu P.C. Biakmuanpuia (Asst. Secy.), Pu Zonunsanga Ralte (Treasurer) leh Pu Vanlalpeka (Finance Secy.)-te an kal a. Organizing Committee nen inkawmna hun ṭha tak an hmang a, zawhnate inzawt tawnin an inhrilhfiah bawk. Hemi zan hian Rorel Inkhawm thlengtu puihna ₹ 1,00,000/- (cheng nuai khat) chu Organizing Committee Treasurer hnenah hlan nghal a ni.

■ **CHOIR CABIN PINDAN RUAKEIBAWL** : Meeting hmasaa kan rel, Choir Cabin sira pindan ruak cheibawl chungchang Synod Officers Meeting (OM)-a kan thlen chu, Synod Trust Committee lamah thlen ni se, tia rel a nih thu, Executive Secretary i/c Trust Committee

hnenah hriattirna copy, Synod Secretary (Sr.) Rev. Lianhmingthanga Sailo hnenah aṅangin kan dawng (MS/GEN-46/2017/27 dated 3.2.2017).

■ **BRANCH REPORT THAR** : Ṭawipui North II Bialah September 5, 2010 khan KṬP, Ṭawipui South Branch dinah ni a, member mipa 7, hmeichhia 3, an vaiin 10 an nih thu report kan dawng a, affiliation fee ₹ 50/- an pe nghal (Hei hi Bialin an lo report hmaih, tun hnaia an rawn hriattir a ni).

■ **BIAL THAR REPORT** : Synod Inkhawmpui 2016-in a rel angin, Cachar Kahrawt Bial aṅangin Kaisanary Bial chu January 14, 2017 khan a indan thu leh Branch ding tawh sa – Kaisanary, Ramchandi, Cachar Zion, Hachhek leh Gharmura Branch-te chu Kaisanary Bialah an beh tak thu report kan dawng.

■ YRC ṬANPUINA PE

1. Kristian Ṭhalai Pawl, Khawhlailung Bial chuan YRC pualin YRC Budget bakah ṭanpuina ₹ 5,000/- CKṬP Office-ah an rawn pe.

2. Kristian Ṭhalai Pawl, Aizawl Branch chuan an kum 10 tlin (Tin Jubilee) denchhenin Youth Recreation Centre (YRC) ṭanpuina ₹ 5,000/- Central KṬP-ah an hlan. YRC ṭanpuina sum hi February 5, 2017 (Pathianni) zan inkhawm ban Fellowship-ah General Secretary Upa Zonunmawia hnenah an hlan a ni.

3. Kristian Ṭhalai Pawl, Ramthar Veng Bial chuan, an Bial Conference 2017-in a rel angin YRC pualin ₹ 10,000/- CKṬP Office-ah an rawn pe bawh.

■ SYNOD CHOIR RAWNGBAWLNA

1. **NGHALCHAWM BRANCH**: January 26, 2017 zan khan Nghalchawm Branch KṬP Golden Jubilee lawmnaah an zai a, vawi 2 dinah hla 6 an rem.

2. **SARON VENG KOHHRAN**: February 5, 2017 (Pathianni) chawhma khan Saron Veng Kohhran Golden Jubilee lawmnaah vawi 2 dinah hla 4 an rem.

3. **AIZAWL KOHHRAN**: February 5, 2017 (Pathianni) zanah Aizawl Branch KṬP kum 10 tlinna (Tin Jubilee) lawmnaah vawi 2 dinah hla 4 an rem. GS Upa Zonunmawian thuchah a sawi a, Pu Zonunsanga Ralte (Treasurer)-in thawhlawm a hlan.

4. **TUIKUAL NORTH BIAK IN**: February 9, 2017 khan Tuikual North Kohhran Biak Inah Mizoram Synod Choir member Tv. Lalbiakṭhuama nupui neih inkhawmah hla 1 an rem.

5. **CHHIAHTLANG HMAR VENG**: February 17, 2017 khan Chhiahtlang Hmar Veng Branch Golden Jubilee lawmnaah inkhawmah vawi 2 dinah hla 6 an rem. Hei hi rawngbawla an chhuah vawi 36-na a ni.



Kantu – Lawngtlai Bazar Branch

CENTRAL K.T.P. HRUAI TUTE, 2016-2018

Office Bearers

Leader	:	Rev. Zothansanga	9436365426
Asst. Leader	:	T. Upa Ngurhmingliana	9436374104
Gen. Secretary	:	Upa Zonunmawia	9436152024
Asst. Secretary	:	Pu P.C. Biakmuanpuia	9436374833
Treasurer	:	Pu Zonunsanga Ralte	9402113038
Fin. Secretary	:	Pu Vanlalpeka	9436153728

Committee Members

Tv. Joseph Lalsangzuala	9436152063	Pu Lalchuanliana	9862364583
Pu K. Lalhualpuia	8132813745	T.Upa Lalrinawma	9436152297
Pu Lalhnehzova	8119947974	Pu F. Lalremruata	9862561961
T.Upa H. Raminunsanga	9436152320	T.Upa Zomuana Ralte	8794722319
Nl. Lalfamkimi	9436365245	T.Upa P.C. Lalropuia	9863144485
Upa Rosangliana	9612166769	Pu Lalmuanawma	9436196515
Dr. Lalrotluanga	9436153937	T. Upa Risky Lalammawie Ralte	9862387308
Dr. David C. Vanlalfakawma	9436156561	Tv. Robert Lalduhzuala	9862368012
Upa Lalmuanpuia	9436142398		

Ex-Officio Members

Rev. Lalzuithanga	-	Synod Moderator
Rev. Lianhmingthanga Sailo	-	Synod Secretary (Sr.)
Rev. B. Sangthanga	-	Executive Secretary, i/e KTP

Postal Regn. no. MZR/81/2015-2017
RNI No. MIZMIZ/2009/29074



Printed and Published by Zonunmawia, Synod Office, Mission Veng on behalf of Kristian Thalai Fellowship
Edited by Lalchuanliana and printed at Synod Press, Mission Veng, Aizawl, Mizoram. Copies – 38,700